

民國安次志

陳寶泉題



安次縣志卷九

藝文志內編詩

唐

扈載

芳草

幽芳無處無幽處恨何如倦客傷歸思春風滿舊居晚煙迷杏靄朝露健扶疎省
傍靈光看殘陽少罇區

宋

扈蒙

桐廬員外出勛德之門以儒素爲業泊來儀於京闕久飛譽於縉紳今則膺
鳳詔於朝端奏牛刀於江表會承旨尙書賦瓊章於丹地餞蘭櫂於清流
愚雖不才敢繼其作

王謝高名江鮑才東遊何用更裴回絃歌好就吳鄉拜簪組初從魏闕來清酒一

尊攜激灑舊詩千首貯瓊瑰健颿輕櫂須行樂莫效當時度信哀

趙文度

贈夢英大師

攜筇何日別長沙鳳篆功夫世所嘉秦嶺夜吟殘海月章臺春講雨天花淨瓶遠貯湘潭水片衲晴披嶽面霞聖主有恩酬絕藝簾前師號紫袈裟

呂端

贈李昉

憶昔僦居明德坊官資俱是校書郎青衫共直昭文館白首同登政事堂佐國廟謨君已展避賢榮路我猶妨主恩至重何時報老眼相看淚兩行

送英公大師歸終南

衡岳煙蘿紫閣雲名高湖外晚遊秦清詞古學儒生業圓笠方袍釋子身竹杖拄歸山裏寺篆書留與世間人我疑簪組成爲縛空仰吾師去路塵

呂誨

和邵堯夫見寄時知鄧州

冥冥鴻羽在雲天，邈阻風音已十年。不謂聖朝求治理，尙容遺逸臥林泉。羨君自有隨時樂，顧我官閑飽晝眠。應笑無成三黜後，病衰方始賦歸田。

韓資讓

玉石觀音像詩和沙門智化元韻

貞珉未用似湮埋，選造觀音衆快哉。募匠俄鐫大士相，成形不自凡夫胎。琳琅光彩院內滿，冰雪威儀天上來。珍重吾師能鑒物，從今免屈非常材。

李士瞻

楚門述懷

我昔放船日，乃在孟冬初。此時風寒競，雨雪紛載塗。是行死生別，妻子不得俱。江南地偏下，况復在海隅。嚴冬如初秋，天氣恆多殊。草木未搖落，布褐被體膚。綱工

此邦人室家念居諸繫舟楚門灣一住十日餘我心如鋒攢從行念跼躅雖沐主
家顧志願良未舒情雖公私牽輕重亦異趨君家素忠義所望同吾徒王程已愆
期日夜畏簡書苟重君父憂內省還何如願君竟茲意早發勿趨趨

贈貢泰甫先生牙笏詩

并序

牙笏一張長勁且闊古所謂記事之笏也聊爲從者之贈詩以志懷不勝
增感

象簡霜凝重蒼髯雪色新轉輸勞算用報答費經綸扶病朝明主臨軒問老臣此
時江海上人已厭風塵

壞舵歌

南溟之魚頭尾黑身長竟船頭侶鐵浮遊偃蹇氣欲吞斜日昏冥映旗鬣煦沫成
煙浪花起逐我船頭趁船尾恐是昔年未死之蟹龍一經譴斥偕厲鬼舟中健兒
眼盡白彎弓擬之三復止明日疾颿驅長雲巨颿高張萬馬奔舟卒思家窮力使
瞬息千里若不聞扳舵逆指衝怒濤欸如生馬當春驕又如驚口直上千雲霄萬

里一息非爲遙須臾有聲如裂帛三百餘人同失色鐵梨之木世莫比今作舵根
爲水齧是木之產非雷同來自桂林日本東當時不惜千金置便欲雲仍傳勿替
箕裘相紹近百年甑已墮矣奚容言眼前生死尙未保惟有號泣呼蒼天高高若
不聞稽顙齊念天妃神我知天命固有定以誠感神豈無因少時風馴浪亦止以
舵易舵得不死我今幸爾同更生開闢以來無此比女媧氏天妃神補天護國相
等倫世代雖異功則均我皇開國同乾坤一年四百萬斛運麾叱雷電役五丁片
艘粒未皆風汎財成本是神之功直與天地傳無窮愧無如椽五色筆磨崖刻頌
驚愚蒙

送秦甫貢先生還朝便先往浙東訪妻子

聖主中興憶舊臣白頭自分老無聞傷心轉在朝天日經亂纔存報主身去國十
年渾似夢到家一飯忍忘君太平政爾煩經濟宣室非干問鬼神

始予發京師時已聞河南平章公克復濟南渠魁就擒計益都之寇可不煩
餘力而下矣夫大將繫國家安危行當慎重爲宗社計舟中有懷援筆爲

賦是又不能不留情也大將名察罕帖睦爾字廷瑞云

久聞大將下山東一戰名成破竹中調度敢煩廊廟計疇咨仍籍相臣功宣光接
武揚先烈方虎聯動振古風宗社有靈須慎重毋勞親手定雌雄

紀事

風送輕帆浪送船神遊萬里水中天魚龍吹雨三更後星月憐人午夜前夢涉關

山猶惴惴起看烟水尙綿綿賢勞詎敢言王事虎穴頻探已數年原註十月十八日夜睡間紀事

并懷尙書徹通理張自南侍郎呂伯益韓汝舟皆一時煙波羈旅之人也明年相會遂得抵掌一笑

舟中聽雨

鴈蕩山前船夜灣雨聲篷外響潺湲半生萍梗何時定萬里冥鴻與夢還南海有

珠輪上國自議必往往泉州希輪上意蓋阿述魯丁回紇冀在此處也江東無警報杉關近有人傳建甯官兵已復邵武江西賊人

已遇杉關衢婺二路復奉正朔五更賦看潮生後親見祥風起艤間

甲午歲題江漢王粲數和答石蠻彥修韻

大江西下思漫漫憔悴王郎舊倚闌貔虎晝嗥沙草白鞭轡夜轉井梧寒帛書喜

託雲中鴈錦字羞題夢裏鸞魏國山河劉社稷可憐無地望長安

春日陪讌道山亭口占

二月春明花乍殘道山亭上翠如鬟天開圖畫峯攢戟地接蓬萊雪滿關雙鳳巢
雲朝貝闕六鰲駕海上人寰微垣官從多時彥聽取山人半日閑

松林午憇

松林坐久午風清溪水潺潺樹有聲何處小舟撐柳外來迎潮落去潮生

紀見

榕樹根垂荔葉齊繞簷宿霧綠初迷鷓鴣啼徹山頭雨午夢醒時日正西

李延興

松下鼓琴圖

幽崖何蒼蒼長松在高岑月出屋東頭微雲生夕陰道人眉宇靜松間調素琴商
聲泛林莽流水爲知音我欲往聽之青山白雲深

訪東安令

青霜下庭柯野日籠簿牘官舍故人逢樽酒兩相對感此惜凋落撫事興慷慨俯仰此踟躕令名不朽在

漁陽客邸

城外雲山濃似綺屋裏琴書靜如水石鑪添火試松香裊裊篆雲飛不起天涯倦客此停驂茶竈煙消猶隱几奚奴呼覺日平西一片秋聲響窗紙

題畫

山翠浮空初過雨山麓晴雲散芳渚霧合長林生曉寒人家更在林深處澗泉六月翻松根石洞千年隱仙侶有誰共奕橘中來無人問路桃源去白煙遮盡青林花野歛嫩香應可茹清幽不減山之陰只欠蘭亭列觴俎誰乎寫此怪而奇莽莽雲山入毫楮細看猶有遺恨處胡不著我山之墅我生本是丘壑姿誤落京塵幾寒暑小時畊牧峴山陽閒從野人學種樹門前魚浦啼竹禽屋上鶴巢走松鼠獨行採藥日暮歸纔得芝朮一斗許縱令服食不得仙何若長年蕝禾黍小村秋晚雞正肥大甕春浮酒新煑老翁醉舞兒子歌笑語喧譁忘賓主此樂不見十許年

兵火煌煌照南楚思歸見畫萬感生悵望風飄橫浦溆時清即好謝官歸全家移
向山中住

壁間雜畫

山中之人氣奕奕愛畫雲山與水石遠山近山恣一揮頃刻生綃數十尺今代只
數高尚書妙處不減米家筆後之善畫者爲誰青山白雲久蕭瑟忽驚座上煙靄
生漠漠平林翠如織平生夢想不可到乃在君家雪色壁花發窮林破曉紅水合
長天蕩晴碧蘆邊雁影落廻汀沙上漁蓑曬斜日白髮蒼顏四老人棋罷松間坐
爭席筍皮笠子大如織歸去不愁山雨濕爐經九轉鍊丹成杖挂百錢沽酒喫眼
看此景不可親况復憧憧事塵役會須結屋山之阿更求好田水之側野人生理
日有餘耕歸牛角懸書帙茅檐夜火促寒機古甸秋風收晚粟安車若便下丘樊
爲勸先生不可出

松雪翁畫馬

西海之西天地翕合敷靈氛天產矢骨超崑崙月窟而東而北幾萬里是馬乃能

籀星辰踰渤澥掃空冀北凡馬羣曹將軍是開元以來善畫者蚤以絕藝動紫宸
不問躡黃與牝牡筆力到處春無垠往時嘗見一二本世之畫者徒紛紛吳興學
士皆在詞林館畫人畫馬咄咄能逼真玉堂朝日射碧瓦瑣窗晴雪吹青春文章
之暇秦詔寫龍種冰綃萬幅清無塵此圖神采更飄逸妙處不減曹將軍飛雲滿
空散靈雨五花凌亂曉濕蒼龍文人言此是明皇御愛者天香滃鬱飄滿身瑤池
渴飲雪混潑霜蹄迴踏雲磷响黃鬚鬪官似是太僕張景順自幼調馬馬亦馴想
當牽來赤墀下皎如飛龍下天門山齋看畫白書靜丹粉如沐清心魂龍媒一逝
九霄隔龍沙泱潑霜風昏縱令有馬無善畫誰與寫之傳世人吳興自有古作者
高風遠韻不可聞九京安得起公死請公爲我放筆電掃層空雲陳君愛畫不啻
南金與西玉百迴展玩當爐熏南金西玉可力致嗟此神物復然獨立而無鄰烏
乎神物爲物固有神直恐變化爲龍飛上清都紫微之帝闈

黃崖寺

黃崖秀絕不可畫山際飛雲如走馬東來無此好雲林况逢野衲同清話茶煙侵

午客題詩松籟吹涼僧結夏人間塵土誠污人何時息影禪林下

度居庸

歲暮矣風淒淒車中行客胡不歸一車南一車北南來北去何時息車行欲近關
上頭鞭牛不前吁可愁須臾推挽在平地車中兒女歡且謳短褐蕭蕭風雪裏山
徑荒寒多虎兇呼兒取火供晚炊瓦鑿黍米和沙煮黃昏露宿官道旁茅店雞鳴
載行李殷勤起謝車中人萬嶺千山多辛苦嚴風吹霜皮肉死一身只有筋骨存
安得筋骨化爲山下土填却千山萬山無險阻盡使行人免愁苦

丙申歲詠懷

白首殊方客奔馳戎馬間時危憂母老歲晚寄書還凍雪連荒野寒雲出亂山蒼
茫西日外痛哭倚柴關

辛苦憐吾弟荒山久避兵素書連月斷白髮滿頭生雪翳窗燈影風沉戍鼓聲寸
心憂百結寂寞度殘更

妻子何時見淒涼病轉侵虛傳千里信已負百年心茅屋飛霜滿空階落葉深白

頭吟正苦回首淚霑襟

和陸公九日韻

秋聲橫笛外曉色畫屏中黃菊雙頭小青山四面同船衝官渡雨木落市橋風十日燕臺路途窮興不窮

窗燈

窗燈搖影細城柝報更遙白髮愁偏重丹心老未銷雲陰籠月薄秋氣挾霜驕歸思如江水滔滔逐逝潮

春日郊行

岸柳含煙碧山桃噴火紅長松落姓雪薄袂受暄風伐木隨樵子攜錢覓酒翁猶勝狂阮籍白首哭途窮

讀賈誼王粲傳

白髮悲王粲青春羨賈生萬言詞慷慨一賦氣崢嶸弔屈心猶壯依劉恨未平懷賢坐長夜斜月半窗明

夕次同川

鴉噪晚涼天新晴景豁然柳橋通水市荷港入湖田鷺影沙頭月人煙渡口船相過又相別書到是明年

龐村

野曠煙花白林深露草香雷聲送雨過山氣入雲長遠水鷗邊靜薰風馬上涼長亭無限好暫此解行裝

秋日山行

林路鬱迢遙村行野興饒兩山青入屋一水白平橋掃石收松子畊烟種藥苗仙人王質輩應向此中樵

宿嘉祕寺

寂寂青山寺千峰翠欲薰禪林黃葉落僧飯白猿分松磴吹晴雪柴扉鎖暮雲悟窮清淨理莫遣世人聞

山中值雨

風雨連天黑關河入望遙青山懷故國白首戀中朝
小市河魚上殘城野火燒寄身岩壑裏生意日蕭條

贈時中

白首相逢寥落中失聲一哭莫途窮霏霏江草愁邊綠
寂寂宮花夢裏紅海徼歸心懸夜月柴扉病骨臥秋風
人情任逐東流水爛熳金樽莫放空

題萬松金闕圖

袞冕曾迎鳳駕來煙沉金闕半蒿萊霞蒸日氣紅初上
雲壓松陰黑半開玉井霆轟龍起蟄虛窗笙響鶴飛迴
前朝事往雲無跡愁聽江聲入夜哀

挽張及民老先生

寂寞城南一畝宮百年遺響寄孤桐巢由杖屨雲山外
陶阮生涯酒榼中祠壁鬼燈然夜雨墓門翁仲嘯秋風
招魂不隔蘆溝水淚灑霜林萬葉紅

和梅知府寄來詩韻

坐想親朋摧肺肝寄來尺素百迴看虛窗琴冊塵埃亂
匹馬關山雨雪寒避地十

年頭欲白去家千里淚難乾
酒壺爛熳堪謀醉強撥羈愁一盞歡

和周尹韻

雨餘秋水遶新軒
心迹雙清好莫言
松寺尋僧陪鶴侶
茆陰對客數雞豚
年光荏苒驚殘夢
生事蕭條憶故園
兵後故人知好在那
堪白首臥衡門

自述

八口淒涼生事微
中原羽騎日騑騑
天寒歲晚歸難定
水遠山長信轉稀
青眼故人頻送米
白頭慈母尙縫衣
蕭蕭漢洛兼葭老
好向兒時舊釣磯

京口夜泊

醉客滿船歌月明
隔江燈影逐人行
帆衝雨脚迴京口
鐘送潮頭打石城
南渡衣冠愁北望
東臬簫鼓報西成
桑田海水依然在
不管人間有變更

別易水諸公

一家遠隔萬重山
古道人稀獨自還
夜月屢傾燕市酒
春風又度雁門關
晴天雨散千峰外
野屋雲生半席間
兄弟何時重會面
燈前相對話時艱

雪

開門飛雪疊階除宛宛溪山畫不如野火遠明暄獵騎茶煙半濕認僧居雲深空
谷難尋路風急虛窗亂打書坐待春陽迴宇宙無邊生意滿茅廬

寄思溫尹詩

長松過雨碧蕭森涼籟吹香滿素襟泉落空潭秋洒洒雲生虛室晝陰陰塵埃書
劍千秋路風雨江湖萬里心客散衡門更清絕月明誰聽紫瓊琴

詠雪效時體詩

隔屋狂飈怒擊撞一庭皓彩翳寒缸星妃夜翦銀河水雲氣朝橫玉女窗梁苑賦
成誰第一瀟橋人去更無雙到門疑是洛陽令有客尋詩驚吠厖

登雅宜山

雞犬柴扉竹裏開仙人別住好樓臺松聲忽向琴心起雲氣遙從澗口來六代衣
冠隨水去百年天地逐輪迴興亡總付登臨外爛醉春風臥碧苔

朱長史致仕還里